

福建通志

第拾冊
山經

K295.7
1

福建山經卷十八

建寧府

建安縣

馬鞍山在城東北三里入閩志云又名瑞峰狀若馬鞍郡之主山也宋淳熙中太守韓元吉以山勢低於客山乃種萬松於其麓以益之今已不存而再植者復蒼蒼矣

雞籠山入閩志云距城五里與馬鞍山聯屬

天馬山距城二里入閩志云狀如奔馬閩書云山顛有峯高圓由東而分爲白鶴山中爲小黃華山西來突起圓隴以至府治之後與大黃華相接

黃華山寰宇志云郡圖云在郡東元嘉元年徙郡于黃花山西是也入閩志云其脈從馬鞍山而來郡之護龍山也宋建炎初韓世忠討范汝爲屯兵其上元至正二十年僞漢陳友諒寇建寧亦列營於此閩書云在

府城中東北自淞之處州縣亘六七百里止於此山劉宋時守華瑾之徙治山西麓元末左丞阮德柔築城山頂下屬舊城以禦陳友諒國初都指揮時禹拓大之此山遂在城中上有樓曰黃華鐵獅白鶴紫芝黎嶽屏風天湖諸峯環峙雄踞若鶩若翥一郡壯觀也

雙髻山八閩志云在縣城北安泰里兩峯相並亦名筆架山

北山秦觀閒軒記云建安之北有山巋然與州治相直曰北山山之南有澗澗之南有橫阜背山而面阜則徐君正大燕居之地其名曰閒軒

東山在縣東北二十里閩書云一名蘇口山與相屬者有盤山以其寬平如盤道光志云迤北有嶺曰涿嶺嶺上兩山對峙俗呼雙門曰天王嶺界甌寧

鳳凰山在縣東北二十五里八閩志云在吉苑里山有鳳凰泉一名龍焙

泉一名御泉自宋以來於此取水造茶蘇軾鳳味石硯銘序云北苑龍焙山如翔鳳下飲之狀當其味有石蒼黑堅緻如玉大原王頤以爲硯

予名之曰鳳咮卽此是也閩書云北苑在其麓其地宜茶凡三十里

案寰宇記有茶山云在郡北民多植茶於此山涉冬翠其色志皆不載
疑卽鳳凰山獨輿地廣記云在建陽縣然建陽各志亦皆無之今附此
龍山八閩志云狀如龍蟠與鳳凰對峙

白土山八閩志云以其土色白故名

壑源山在鳳凰山南八閩志云高崕數百丈此山之茶爲外焙冠俗謂之
浮火山又曰望州山

曹鼎山在鳳凰山南八閩志云一名作高山右有曹聖者茶場

八仙山在縣東北一百三十里八閩志云在川石里俗傳昔有仙人過此
道光志云其支曰營山東西兩溪夾流其下曰五臺山右連銅坑山左
接鳳髻山曰蝦蟆山界於政和其旁爲靈巖爲奕棋巖有嶺曰牛頭
白雲嶺俱川石里案八閩志又有八仙巖與八仙山不異

辰山在縣東北百數十里八閩志云在東莨里山大而最高其顛可望日

有三峯曰逍遙曰飲坑曰牛頂

閩書作頭

又有石鼓擊之鏗然又有牛心洞

中懸一石如牛心山之下有蘆竹洞山腰有蛟窟道光志云有嶺曰斷

軍嶺有石高二丈餘形如人俗呼將軍俱東莨里

即牛巖八閩志云在東莨里以形似名巖下有洞

白鶴山在縣東二里寰宇記云晉以望氣者言此山有異氣命土工斷之乃有二白鶴冲天而去因此爲名八閩志云山之麓有靈湧泉

響山輿地紀勝云在縣東五里其山空洞枕溪側行人相呼若有應者閩書云溪中與有小洞名浮石人以其水泛不沒若浮然又云漢梅福煉丹響山其徒陳先生者每竊食之福怒拔劍逐先生先生逃入此洞名逃奴洞矣

龜嶺在古苑里道光志云爲東道通衢路只容一二人下臨十餘丈深溪蓮花山在縣東建寧里道光志云相傳夜有火光如蓮

銅場七峰八閩志云在城東古苑里七峰連屬中三峰並馳如渴驥奔泉

特異諸峯有嶺曰盤古嶺土地嶺福嶺有洞曰烏虎洞俱吉苑里曰銀
林洞曰風洞投以石大風彌日曰兩洞附近諸里禱雨于此又有溫村
嶺蛇嶺牛輓嶺俱順陽里

寶勝巖八閩志云上有飛泉百尺直瀉澗底望之若玉虹然

靈巖八閩志云在玉潭巖形方而兩穴相疊高一丈五尺廣二丈五尺上
三巖在川石里

仙人山八閩志云在縣西北房村上里一名龍山其山自郭巖發脈高聳
而來至璜溪始平坦堪輿家謂如仙人撒網形

大富山八閩志云在房村上里山不甚高而土脈膏潤因名元季邑人楊
福興嘗于此山種木成林戒子孫留以備學校寺觀祠廟橋梁之需及
貧民養生喪死之具福興明少師榮之祖也閩書云在龍津里人名其
山曰萬木

印山八閩志云在璜溪西南其形方而伏如印

箱山八閩志云在璜溪東南以形似名

曹山八閩志云相傳曹聖者嘗爲邑雷氏擇此地

龜山八閩志云在璜溪之東

鳳山八閩志云在璜溪西

虎山八閩志云在璜溪北

隊魚山八閩志云在璜溪南羣山突出若隊魚之狀

多山八閩志云在璜溪東北形如獬豸

圭峰巖在房村上里八閩志云有峰峭立如圭

石鼓巖八閩志云在瓊溪巖頂有石如鼓

洋石巖在房村上里八閩志云巖前有田數頃一望平衍

寶曆巖八閩志云巖上有庵以祀魏仙在房村上里

龍興巖在房村上里八閩志云前有龍興觀故名

靈仙巖八閩志云有庵以祀馬仙在房村上里

蛟窟嶺閩書云舊有蛟滾地成窟因以名嶺

靈池嶺八閩志云相傳梅福修煉於此

大雪嶺八閩志云閩中雨雪到地卽消惟此嶺極高峻積雪累日

曹巖嶺八閩志云昔曹聖者嘗棲息於此閩書云地產楊梅色紅者俗名

聖者楊梅

天湖嶺八閩志云嶺之顛有水一泓

丁坑嶺八閩志云嶺下居人多丁姓案以上俱房村上里

伏獅巖八閩志云在房村下里巖下有越王潭相傳越王嘗遊其地道光

志云又有橫巖如靈巖

獬多峯八閩志云在房村下里案疑卽上多山

象山在縣東南三里八閩志云山形如象其鼻圓轉抱水一泓冬夏不涸

又名白象捲湖

梨山距城十五里寰宇記云在郡東南其山爲郡勝槩之地八閩志云奇

秀冠諸山唐刺史李頻雅好登臨於此既卒郡人思之立祠其上宋郡守盧幹爲立碑下有小梨峰相傳頻始葬立祠於此忽一夕風雨大作祠之香火飛掛梨山之樹建人因伐樹刻像祠之

黃桅峰八閩志云在城東南將相里地多產黃桅

龍池山輿地紀勝云在縣西南六十里八閩志云山頂有水一泓舊傳龍居之

三門山八閩志云五代時王氏據閩置柵於此以守疆場故以門名在登仙里

雞足山八閩志云山有三峰狀如雞足

隊羊峰在三門山迤西閩書云連岡接隴而下形如隊羊

屏風山與隊羊峰相近八閩志云羣峰連屬拱揖左右中一山截然壁立空翠間狀若屏風在登仙里

百丈峰八閩志云在登仙里上有百丈巖巖畔有雙龍泉

寶蓋洞八閩志云去百丈巖二十餘里

寒巖八閩志云下有南澗發源於巖上

定心巖八閩志云在詹墩舊傳有道人結屋巖前終日禪定因以名巖

威禮巖八閩志云在趙家山相傳有道士建庵奉佛因名

雲竹巖八閩志云巖極高聳上多松竹在登仙里

虎頭巖輿地紀勝云在秦溪里山形高峙如虎踞狀道光志云旁有涼傘

山下有孤石聳立如人

鶴峰巖八閩志云其狀似鶴巖之前兩山並立俗呼寒山拾得旁有水一

泓

三姑巖八閩志云山形高峙如人立狀上三巖在秦溪外里

白石巖八閩志云在城南秦溪內里

黃龍峰八閩志云在城南南才里道光志云旁有巖曰火星曰樹水曰吉

雲曰虎踞

冥陽書陽洞八閩志云在南才里初入甚暗良久方明故名舊志云卽後

漢宜新太守楊仲產所居之地道光志云蝙蝠洞亦南才里

覆船山在城南三里建安甌寧二縣共轄寰宇記云在郡南其山形如覆
船昔太守駱文廣移郡於此山之北案吳永安間太守王蕃築城山下
至陳天康閒刺史駱文廣乃移之

案八閩志獨載甌寧下今不從

魚峰閩書云有瀑布石門菩薩巖仙人跡汗尊水簾七松壇萬石塔號八
景瀑布白山頂瀉下數百尺飛濺尋丈外號天下第三瀑布

甌寧縣

天湖山輿地紀勝云在城北十里北津下其山有三十六景八閩志云如
雙虹泉空翠亭之類其尤勝者也建炎兵燹皆廢閩書云自浙龍泉西
北來建鎮山也又有梅巖晦庵講學之所

黃畚山在天湖山前閩書云在城北五里

靈鷲山與天湖山相近輿地紀勝云在崇安里半巖有亭

將軍旗鼓山八閩志云山有四峰左一峰如鼓右一峰如展旗中二峰如人聳立在崇安里

劍門峰輿地紀勝云在崇安里清溪中注東西兩峰如劍對峙

圓峰八閩志云其峰圓在崇安里

白石巖八閩志云巖潔白不附撮土上有巨穴穴中有亭

徐將軍巖八閩志云前後二巖峭拔寬廣有徐將軍駐兵於此黃巢入閩鄉民避巖中

石輪洞八閩志云在城北崇安里高峰環抱內有石潭其外石壁創立俗傳潭中有龍宋游聖者至此以鐵鍬鏟石壁作一大石門潭水遂竭後聖者化去大雷雨溪流漲湧陂堰多壞人號游破陂

壺山在縣北七十里八閩志云相傳仙人壺公與費長房嘗遊此山山瞰大溪石壁削立上鏤壺天寒冰玉屏六大字道光志云亦名登高山

案寰宇記無壺山有登高山引續齊諧記云費長房語桓景云云各志皆不之引殆以事係汝南無關於建安歟

東魯峽山與壺山相近八閩志云其山中斷溪道於其閒

三峰山八閩志云山有三峰其中峰石壁上鑿洞天二字

菴山八閩志云山有白鶴庵故名

般若菴山八閩志云山有般若庵

洋峰山八閩志云屹然特出於眾山之中其頂甚平

雞籠頂山八閩志云與洋峰山對峙山根盤據數里其顛狀如雞籠上七山在禾義里

蓬嶺山八閩志云在禾義里道光志云又有樓梯嶺高十五六里下臨深坑行者心惴曰父母嶺峽水潺潺徑路崎嶇曰滅巢林傳黃巢滅於此柏香巖八閩志云在禾義里地多黃柏

天堂山在城東北八閩志云高出羣山林木蓊蔚其顛高明爽塏登者心

神舒豁如在天堂然

擎天山與天堂山相望八閩志云二峰峙立一峰最秀而圓銳高插霄漢如擎天之柱宋謝枋得遊此嘗有記在城東北西鄉里擎天巖上薄雲霄

獅巖輿地紀勝云在西鄉里巨石如獅閩書云慈惠里亦有是巖

寶石巖八閩志云舊作寶國巖閩書云在萬石灘上

北巖八閩志云下有北巖寺宋政和陳朝老讀書于此上二巖在西鄉里郭巖在城西北八閩志云在梅岐里舊傳西漢時巖乃郭仙所居舊志梅福爲南昌尉上書不報隱于建之城南山上學仙後望見郭巖有紫氣往訪之時岐公已先居焉因與同處今其里號梅岐以此名勝志云郭仙自號岐公

雲巖輿地紀勝云在西鄉里八閩志云昔有普濟大師坐化其上其頂有獅子鈴石石二大者如獅小者如鈴巖之右有雪巖雙峰並高

仙坪巖八閩志云三峰高聳頂有巨石如棋盤

西峰洞在縣西北八閩志云界西鄉紫溪二里內可坐百人有鼎爐石牀有巨石如方座高二十餘丈名勝志云在西鄉紫溪二里界

毛仙峰八閩志云在紫溪里相傳毛黃二仙煉丹于此

大米山小米山在縣西北道光志云兩峰岐嶷俗傳出米供僧鑿之遂絕天寶山在豐樂里八閩志云峰巒連屬延袤五六十里

斗峰山在豐樂里八閩志云高五六百丈山形左右低而中高其高處方平如斗道光志云有石鼓松蘿蓮花湖諸勝

塔嶺山在縣西北八閩志云山舊有石塔因名

白石人山在縣西北八閩志云山多白石或似人形在禾供里

小湖峽山八閩志云在禾吉里以小湖溪流經山麓兩岸峽束故名

蔣峯山八閩志云山前有蔣庵蓋昔有蔣姓者居此在禾吉里

禪巖山在禾吉里八閩志云山之絕壁有巖穴僧無垢自古田雪峰來坐

禪其中

黑牛山在縣西北三十里八閩志云山之下有黑石如卧牛狀

烏石山與黑牛山相近八閩志云在萬石灘上

北平山八閩志云其山南多石而北坦平

西巖深山八閩志云在慈惠里山之左有石壁高十餘丈以山在深頭故名

蓮花峰八閩志云在慈惠里以形似名

歸宗巖八閩志云在慈惠里舊名鬼子巖宋淳熙間有曹道人結庵於此改今名閩書云一名梅巖有紫雲堆補天遺品石棲雲洞風洞落珠崖石心泉香爐峯巖洞峭奇一壑萬狀

西巖八閩志云在慈惠里舊名曹巖

龍首山在城西三里輿地紀勝云勢若龍舉首故名八閩志云一名華源山舊志云昔有華氏居此下有華歆井歆未必居此因山有華源之名

好事遂以爲歆鑿也

天關地軸山八閩志云下有天慶觀

玉清洞八閩志云在城西天慶觀側溪潭中舊志云昔有漁人沒潭中見石室金字題扉曰玉清之洞

慶成山八閩志云下有慶成寺道光志云在縣坊

黑窰坑山在縣坊八閩志云山下舊有窰

鳳山在縣西道光志云與吉陽里之鳳山別其麓有鳳眼泉曰石鼓山有石如鼓曰筆峰山上有石洞曰凌雪山曰華陽山上有石門龍洞曰雙峯山有龍井曰雙鳳山甘泉湧焉泉多穀貴少則穀賤曰文筆山曰羣鳥山曰龜山俱高陽里

馬大仙巖石龍巖金鳳巖躡雲巖八閩志云四巖在高陽里

高峰山八閩志云界吉陽梅岐二里連互甌寧順昌三縣層巒疊嶺其中峰挺然高五千餘丈登其顛非一日不到一名郭巖一云在郭巖之西